

余山

山

集

續

集

北游草序

黃州王澤弘撰

余於戊子秋來京師道經岐亭與桐城方爾止先生邂逅相遇縮帶定交因得窺其篋中諸體詩心甚悅之以爲高老渾脫有少陵風今世所自命爲詩家者皆不及也是年余北征不果而方先生亦倦游南還余又於甲午冬再至燕居此者且四載餘每從諸友人所論詩輒謂不得方爾止先生此道幾無可告語者蓋將俟異日南歸之後相約爲世外交不圖與先生復相見於京邸也先生詩自甲申起至丁酉止分體編年凡三十卷曰禽山集已付吳司理錦雯往梓於吳門矣茲則丁酉冬至戊戌秋京邸所作諸贈答詩另爲一卷曰北游草以

續龔山集之後行將歸白下梓行之於其歸也命余一言綴於篇端余觀先生此詩較岐亭所示諸詩漸老漸熟漸造平淡正如少陵夔州以後香山洛陽東坡海外之作天機爛熳幾於神化不當以聲色臭味求之而不知先生者舍其詩弗論謂先生以處士而與公卿大夫游又人其名詩題中以此爲詬議余謂處士與公卿大夫果有異乎哉先生雖與諸公卿大夫游其所贈答詩無一媵阿之語自負甚高寄托甚遠與昌黎所上宰相書等不爲公卿大夫所忌諱亦幸矣其肯以此取悅乎况所謂公卿大夫皆先生向時風雨寤寐數十年不渝之交如以其仕隱殊途遂欲與數十年朋友之交絕其於詩人忠厚和平之意遠矣余幸不爲先生所絕時時

過余寓齋連牀接席動經旬日而余對先生亦不覺其爲處士也先生且進而教余以事公卿大夫者之道與素所論詩相表裏則今日長安邸中又何以異於同游岐亭時耶知此意者始可與讀先生詩矣

北游草序

舊京王 黃撰

詩本人情該物理其大者可薦郊廟感鬼神而二南十
五國風多塗歌巷謳田夫游女之作要以直任自然無
取雕飾故古詩十九首情真景真事真意真遂開至極
鍾叅軍之評詩也曰詩以吟詠性情爲主亦何貴於故
實如思君若流水高臺多悲風清晨登隴首明月照積
雪之類何其妙也昔人稱白香山廣大教化主其爲詩
率令老嫗讀之豈非本人情該物理深有得於風人之
旨歟吾友方爾止以詩名家者三十年大都獨寫性靈
直抒胸臆蓋鎔鑄經史取其精液卽景以會情因事以
達意故不必艱深險澁如江河之行順流善下及其觸

山赴谷風搏物激然後滂泮洶湧以盡變出奇要自成
爾止一家之詩然與香山異曲同工填唱而箴和矣吾
獨怪香山當元和長慶間其直聲亮節震焯宇內至於
篇章流布繕寫摹刻銜鬻市肆甚者雞林賈人自云其
國宰相每以百金易一篇其僞者宰相輒能辨之自著
作以來未有如是流傳之廣者而爾止顧獨鬱鬱不得
志於時又遭家難漂泊江淮間渡河踰濟直走幽薊與
燕市酒人悲歌飲泣已而短衫破帽策蹇驢出入關塞
尋盧龍之故壘弔首陽之荒墟發爲詩歌以洩其沈頓
無聊骯髒不平之氣卒乃垂翼而歸吾未嘗不惜其才
而悲其遇也雖然詩人多蹇又云詩非窮不工果如李
杜文章光焰萬丈雖坎壈終身正復何恨識者讀爾止

詩益信其人自此傳矣蓋爾止沉酣此道已三十年年
輒有集其篇帙之富不減香山他日必有辦百萬錢爲
戴逵起宅如郗超其人者當盡付剗刷俾長慶集不得
獨有千古但予僅同白家老嫗媿匪微之其安能爲香
山序也耶

北游草序

關中李楷撰

吾友方子爾止取其甲申以後十四年之詩依體編次曰龔山集余旣已序而傳之矣過此以往其詩日繁大要每歲自爲一卷以附於前集之後曰龔山續集此則續集中之一種也蓋方子北游於燕薊覽金臺山川之勝徘徊於宮闕之下長揖公卿飲酒賦詩又策蹇塞上東臨碣石以觀滄海寄托蕭遠感興雜出於是其詩益以豪天下之知方子者益以衆夫雲間之陸入洛而宦灞陵之梁顧京而噫士固有志不可強同方子之介介於龔山豈其無故而然歟懷故鄉者仁之道思先聖者厚之風且其入燕趙悲歌感慨之域易於淒涼激壯難

於和平溫雅非有樂天知命幾於見道之懷其志其辭
惡能和平溫雅至是哉方子與余交最久余知其詩之
要領感時懷古根於性情卽不免於贈答皆直書其交
情不爲虛譽不爲諂曲斯亦異於人之爲詩者矣方子
以爲譽而諂者其志卑其初皆迫於有所求求之而不
得則怨誹生焉吾不爲富貴折節肯以貧賤干人乎若
方子者可謂詩人之有守者矣嗟夫盩山在鍾離郡固
萬國玉帛之遺蹤也於昔爲新豐於今則荒墟方子果
何所求而取以名其集哉人將以爾止爲愚矣夫爾止
古君子也而可以謂之愚乎

嶽山續集

北游草

皖桐方 文爾止著

嚴 沆子餐

同學 陳台孫階六定

宋 琬玉叔

吳百朋錦雯

五言古體 三十二首

都門懷古十六詠 以下丁酉冬作

黃金臺 在易州燕昭王築

燕齊壤相接 秦世受侵伐 昭王不勝忿 闕館似宮闕 求
賢爲復讐 郭隗充駿骨 果得樂將軍 一戰傾溟渤 千古
快斯舉 高臺永不沒

易水

在固安燕太子送荆軻處

荆卿固烈士謀畧亦太疎其意有所待何不稍躊躇丹
既促之行高生合同車乃用黃口兒事債志不舒至今
易水上行旅仍悲歎

黍谷

在懷柔齊鄒衍吹律處

鄒生善談天稷下人士驚雅游至薊北道路爭相迎有
谷故陰寒四月草不生一爲吹黃鐘陽氣遂滿盈種黍
實離離千秋垂令名

北平城

在薊州漢李廣嘗爲太守

赫赫飛將軍分符守疆場單于畏其名不敢踰沙磧昏
夜行草間射虎乃中石此石遂千古觀者咸嘆喑灤河
亦有碣附會非真跡

軍都山

在昌平漢盧植隱處

董卓亂天紀舉朝皆側目強哉盧子幹抗議獨不辱權
臣欲殺之間道走上谷匿影此山中談經坐茅屋先主
龍潛時亦在弟子屬

樓桑村

在涿州漢昭烈帝所生處

炎漢運方終魏吳皆僭竊中山隆準後此地生人傑有
桑如葆蓋已兆飛龍業高光獲再興正統賴不絕至今
西南隅民猶奉昭烈

徐無山

在曹州漢末田疇隱此

昔有田子春逃名隱山嶼魏軍征烏桓秋水迷失道君
因父兄讐躬請爲之導讐復志已愜爵祿非所好我今
適盧龍臨風一憑吊

念山續集

桑乾河

在良鄉音張華所居

史稱張司空博物妙天下卜居此河上園林定瀟灑不
圖慕容亂倏化爲平野悠悠桑乾水南北通車馬借問
車中人誰是讀書者

酈亭

在涿州北魏酈道元所居

酈生有故宅亦在桑乾東閉戶注水經江海靡不通豈
惟考據確兼之文詞工我今渡河水停車遡遺風斯人
不可見落日鳴孤鴻

賈峪

在房山唐賈島所居

浪仙始爲僧中歲成進士當其年少日讀書乃在此其
詩好幽峭其人亦相似薄宦游長江竟以窮獨死但令
篇什存何必躋無仕

竇莊

在薊州五代竇禹鈞所居

恒情愛其子孰不望繁殖至於多且貴天也非人力竇
老五男兒次第登顯職雖云積善慶真宰意莫測洛陽
司馬公平生作何慝

柴市

在都城內宋文文山遇害處

大宋文相國浩氣塞乾坤一朝赴柴市日月爲之昏秉
彝有同好立廟太學門崇祀四百年凜然忠義存此道
今寂寞誰與薦蘋蘩

憫忠寺

在外城宋謝疊山餓死處

侍郎隱名姓賣卜建陽橋行省忌其忠劫之來北朝寧
甘首陽餓不折彭澤腰畢命此寺中千古魂未招我來
訪陳迹霜樹空蕭條

天壽山 在昌平有明十三陵在上

峩峩天壽山海嶽鍾靈秀
長陵位中央 列聖分左右
萬古所傷心 思陵禮未就
社稷既已移 松柏豈長茂
遙瞻一再拜 潺湲淚沾袖

西山

在都城西麓利極盛先朝名人題詠頗多

西山富林泉出郭未云遠
試問京華客 幾人曾策蹇
先朝屢行幸 諸利藏琬琰
侍從多名臣 高吟摩碧巘
老僧顧我笑 來游亦何晚

報國寺

在外城有古松十餘株相傳金人所種

人事易衰謝天運亦禪代
如何此寺松 五百年猶在
風沙霜雪裏 見者無不愛
但惜勢倉皇 閒吟得幾輩
惟有素心人 時來一相對

十月一日入都遇朱山人西長

朔風吹黃沙白晝爲之黑有客騎跛驢衝寒入京國道上所逢人不知幾萬億嗟我山澤癯曾無一相識忽有長髯公披褐立路側望見遙呼名驚喜動顏色問我何時來行李何處息牽衣造其廬咄嗟治朝食因及去年事停餐淚霑臆世人游京師鮮不求官職爾我本無管奚取游向北西山松柏存天晴共登陟

王秘書洵來齋頭夜集

昔游麻姑城邂逅如故知忽忽不忍舍中路遺我詩一別倏十年西望長相思所恨道里遠山川又間之尺書且莫寄重逢定何時今我家難飄零到京師聞君官著作讀書先在茲倉皇求一晤彼此皆參差明晨以馬

來迎我過鳳池握手各興歎非復當年姿焚香坐秘閣
酒饌多華滋日晚不令歸畱宿焉敢辭上林春萬樹而
我無一枝燕雀且雙飛而我無雄雌富貴固有命貧賤
良可嗤倘許時相過盤餐卽恩私

程詹事其相齋頭夜集

神京本宦海來者不知數上而至政府下而至郎署一
落緇塵中鮮不渝其素我里程太史蚤歲翔天路入爲
侍從臣經術蒙眷顧出爲多士師畿輔歸陶鑄名位日
以崇盛德了無預斯夕惟閉門讀書窮四部墨妙宗平
原蕪苑稱獨步守已最矜嚴接物轉謙恕豈惟今所無
古人亦罕遇時當一陽復霜月掛庭樹有客夜相過蕭
然兩芒屨秉燭開西軒淒冷如澗戶自言新篇熟可以

恣良晤旅舍何必還且畱話親故帝鄉非吾願所樂山
水趣回思龍眠間峯壑有佳處行將脫簪組逍遙賦歸
去未幾其相卽請告矣

奉酬魏都憲石生

夙齡甘蕩落秉未爲農夫城市且不入敢望遊京都山
鄉風土惡昨人有豺豕迫我出巖谷遙遙涉江湖行吟
至輦下冠蓋盈九衢誰肯廻一顧恤此山澤癯魏公立
臺端高義雲天俱忘其簪紱貴樂交布衣徒賢昆守江
淮竟甫先生與我情最孚因訪遺佚士謬稱微賤軀頃者謁
公門延納不須吏假館憇我裝授餐供我舖期我以深
夜飲我以醞翻下問無別詞孔顏暨程朱窮理極淵藪
味道皆膏腴旁通及風雅六義非殊途始知卿相內尚

有真師儒小子故狂簡向學多艱虞所願終此身奉公
爲楷模女蘿本柔條兔絲亦平蕪得附松栢枝千歲永
不枯

永平訪宋副憲玉叔

以下戊戌春作

君昔官司農弭節蕪江邊是時我賣卜逃名隱市廛故
人候相遇執手情歡然飲我以酒漿和我以詩篇更念
旅食艱分俸至萬錢感此不能報胸臆長拳拳明年江
上別歸種山中田山中有猛虎嚙人無豪賢巖穴難久
居辟讐走幽燕京師冠蓋地豈無縞紵綠誰可告心曲
急難相周全聞君奉朝命保釐京東偏道里未爲遠曷
敢憚山川况有談叟偕策衛風雪天流觀山海勝追思
嘉隆年與君賦新詩塞上他日傳豈直爲升斗區區乞

人憐

謁夷齊廟二首

驅馬出城西悠悠涉灤水問客何所之言尋孤竹里孤
竹已千年高丘尚餘址砌石以爲城築臺以爲時中有
二聖人儼然具冠履我來謁祠下徘徊復徙倚因登祠
後亭蒼松四圍起崖削臨深潭沙明見游鯉雖有重門
在年久勢將圯敢告郡大夫修葺胡不美

仲尼生周末尚曰予殷人何況墨台氏九世爲商臣孤
竹雖小國安忍忘所親寧餓首陽山必不會孟津或謂
微箕比孔子稱三仁三仁本同氣矢死良有因君乃夏
后裔二子又逸民不仕則已矣何爲殞厥身此語雖中
和恐以僞亂真無寧守臣節庶幾完天倫

贈盧龍李明府公治

漢儒經學多吾愛，鄭高密易數既淵。玄詩箋又切實，其人不可見其地。猶可卽山川阻且長，憑軾知何日。頃者游盧龍，茂宰聲洋溢於公。爲同鄉，繼起通經術。性復好風雅，已入高岑室。我欲往從之，素履恐未悉。不知誰語君，枉駕先蓬草。結交何必舊，傾蓋成膠漆。公退輒見招，書堂擁千帙。宛如通德里，疑義互相質。

贈華州東雲雛

東子舉孝廉，乃在思陵初。其時運全盛，雅不慕簪裾。結茅舉山下，飽讀萬卷書。學成名亦隨，二十三年餘。今春來輦轂下，第游肥如。永平古肥如國與我聚旬月，氣誼良非疎。贈君以一言，幸勿吐棄予。予鄉有高士，王湯及姚徐。

王元俔湯君木
姚文初徐昭法
秉性嗜丘壑從不對公車君既負耆舊
祇合山中居富貴是何物肯以易樵漁所願攻文詞異
代垂令譽

聞吳錦雯授蘇州司理喜而有寄

山人好結交交亦半天下其中最愛我莫若吳君者我
每一詩成君必手自寫古人嗜芟棗其癖信非假君嘗
語同輩吾但不爲官苟微一命榮安忍忘所懼念山三
十卷誓必爲之刊感此知已言朝夕望彈冠豈料十餘
年君尚困林藪妻子未免饑焉能顧朋友今春赴禮闈
射策復不偶天壇同我宿中夜咨嗟久亡何試銓曹首
選得司理除授乃吳郡通貴無與比時我在北平聞之
躍然起此方劊劊工吾集得成矣明日還都門知君未

出都把酒先一酌前言諒不渝吾詩若果傳君名亦與
俱千秋萬歲事豈直潤微軀

宋副憲玉叔見惠繭袍謝之

杜公居夔州客遺細織段逡巡不敢受惡其太美煥白
公居江州客寄輕絳布愛其樸而文受之製重袴我今
居營州故人爲監司惠我山繭袍古色如松脂旣非織
段華又比輕絳貴雅稱山人服服之有道氣憶昔澗州
城與君兄弟居衣我以萊葛一着六年餘此繭亦萊產
視葛尤渾堅願言服無斃奚止十餘年

無題

幽州白日寒孟夏芳草綠士女尚春游牛車遞相續車
中八九女美者顏如玉春山隱翠眉秋水凝曼睞其俗

喜豐艷雖肥不傷肉耻作漢宮粧偏稱閼氏服何必高
高髻玄髮盤幾曲何必纖纖趾青靴自平來下車聊緩
步道路咸以目始知人妍媸不在頭與足

夜泊張秋

夜泊張秋河皓月盈沙渚大小無幾舟歷歷可指數鄰
船有寡婦又携一孤女婦年三十餘女年十四五縞衣
立舵樓風度疑仙侶遠視雖不真月光照如許夜半聞
哭聲其聲亦何苦嗚咽澗下泉悽悽江上雨聽者不能
寐觸引愁千縷借問誰家婦鄉關在何所良人幾時亡
何事來羈旅母女暗吞聲踟躕終不語

夏鎮贈顧水部見山

去秋客彭城駕言之帝鄉策蹇豐沛道買舟於夏陽側

聞顧使君弭節此關梁懷刺欲往謁秋雨霑衣裳篋有
余生書未獲手自將舟師苦相促浦帆去聲隨風揚回首
念伊人蒹葭被新霜其後宛溪友過此登公堂垂問及
愚賤高誼焉能忘今秋薊門歸又至泗水傍停橈奠一
晤不似前芒芒憶昔游雲間所交俱老蒼陳李彭宋輩
陳馭子李存我彭燕又宋子建唱和多詩章思君未得見至今猶彷徨
既見心則喜話言豈尋常幸不吝杯酒飲我秋夜涼四
始與六義或可共商量

淮上遇姜侍御真源兼送其入都

我有四老友漂泊江淮間梁大寓寶城杜二隱鍾山王
二與孫八結伴棲邗關四子高蹈人况復工騷雅孤情
迥自立濁世罕知者至于富貴中落落交益寡惟有姜

使君巡醴蒞揚州折節與之友唱和多綢繆飢則餉其粟寒則衣以裘四子懷君惠時時向人述我雖未識君同類感則一苦吟三十卷道遠無繇質昨從京師回遇君於淮陰兩夜接杯竿傾倒意何深濱行貽我詩不翅雙南金秋風公路浦揚帆待明發黃河日夜流離情頓飛越歸見杜王孫相思共明月

是時仲木物故惟于皇于一豹人在

揚州訪柳鳳簷中丞感舊

神宗癸丑年先子舉進士雖官尚書郎文名著燕市是時柳太公作令於涑水謬與先子交氣味若蘭芷中丞甫弱冠從游在宦邸遙以文相質擊節贊其美并授以古法私心感知已遂結爲師弟恩義金石比所惜吳與蜀山川阻且長哲人先秋萎遺孤口尚黃未及聞庭訓

平生事茫茫中丞懷舊恩四十年不忘一朝遇吾季先
爲道其詳贈詩情淒切讀之裂中腸又贈篋中書當路
爲游揚此道真古人今人曷敢望小子仰高風恨未見
顏色昨歲來廣陵公已入京國及予游至燕公又返江
北參差不得晤惆悵意何極頃者候公門倒屣如舊識
垂問及生死執手多歎息無奈行忽忽不獲長侍側旅
次撰此詩聊以述明德

七言古體 十三首

武林行贈陳胤倩處士

以下戊戌春夏作

我年三十游武林與君伯氏交最深

前侍御玄倩先生

是時君

年甫二十許身已比雙南金蹉跎一別十餘載日月遷

流陵谷改賢兄衣繡懷國恩合室捐軀蹈東海鴈行中

斷不勝情甘隱湖山絕世榮乾坤我亦同心者千里相

思空月明去冬偶游至畿甸聞君在此尋不見豈意元

宵燈火殘太僕堂中共懼燕當年君尚未生髭只今于

思復于思我長十年更憂患那能雙鬢不成絲來朝策

蹇訪我寓手持一卷都門句淚眼愁看北海

一作關

雲傷

心多咏西山樹因憶賢兄使大梁迴車見枉花盃岡

金陵

予舊居也龍江

一作開

又寄一書札至今展看猶飛揚彭咸靈

均自千古褚淵江總何足數匹夫有志名亦傳况兼風
雅才如許所愧先朝老逸民無端奔走溷風塵桃花水
起合歸去湖海烟波作比鄰

空同行贈韓子新處士

盛明

一作本朝

詩人李空同刻畫少陵英魄雄雖產北地家

東雒卒塋禹州深山中百二十年封且樹子孫零落東
西去羣盜焉知世所宗伐其塚墓衣冠露是時盧龍有
韓生道經山下魂暗驚手拾遺骸入舊柳重壘亂石成
高塋我聞此事足千古欲見其人異鄉土今歲驅車來
北平先問韓生何處所韓生兄弟俱偉人與我一見情
自親胸懷淵邃莫可測風期亢爽無比倫况能避世辭
榮祿其節彌堅志彌篤管寧寧甘遼東臥田疇不受烏

桓辱以此傾蓋如舊懽草堂置酒春燈寒坐中偶及禹
州事平生風義良可觀此方孤竹古城在二公子祠亦
頽敗明朝西隰雲初晴策衛隨君往一拜

射虎石歌

北平太守飛將軍猿臂善射天下聞霜郊曠遠喜出獵
歸時暝黑路不分草間驚見一猛虎拔箭射之深沒羽
詰朝尋訪知是石此石峩然遂千古後人經此必徘徊
摩娑歎息思悠哉安得將軍起泉下百騎仍馳射雕者
天台圖歌爲遷安劉明府初度

君不見見列仙傳王喬飛鳧臨葉縣又不見養生家葛洪
勾漏求丹砂二公本是猿鶴侶束帶折腰亦何取從來
傲吏多神仙能以神明爲父母我昔揚舲東海游聞說

仙人阮與劉方春采藥入山去胡麻一飯遂相畱及歸
已是百千載眼底人民城郭改悔別天孫出石梁重尋
舊路還烟靄今年復游北海濱令支山下停車輪乍逢
茂宰有仙骨梁園修竹無纖塵劉商丘人招我琴臺飲春酒
正值降嶽懸弧辰始知今日栽花者便是當年采藥人

高麗二馬歌

我來京師六月餘出門無馬又無輿侵晨徒步走燕市
風沙滿面塵滿裾暮歸旅舍肢體乏中心惻愴聲欲歔
孟夏偶游樂亭邑賢侯贈我金三十語人已有市馬價
徧觀馬羣意不入駿者躡騰駕御難駕者頑鈍行步澁
以此佇立多徘徊忽逢賣人邊外來驅逐霜蹄十數匹
云自瀋陽征戰回其中三五高麗馬形雖短小精悍哉

有一純黑一純白骨法權奇頗合格况是騾牝性柔順
腹又懷駒鮮疾厄借問其價價不多二十四金可雙獲
我愛此馬寧惜錢傾囊買之意欣然東市西市買轡頭
南市北市買鞍韉青絲織帶爲之韁紫竹結韋爲之鞭
呼兒剪拂去塵屑濯以流水毛光潔厚其芻豆勿使饑
黑者如鐵白如雪來朝騎回長安道不似從前歎皸臍
仲夏屈指歸南方有此豈憂道路長况乃生兒果汗血
他年連轡從戎行古來馬亦感知已我懷公惠焉能忘

劉生行爲樂亭劉臥子作

劉生劉生古俠雄深夜飲我書堂中兩人意氣自相合
况乃先世年譜同樽前復有高公子梁州高文采風流
亦相似聽我論詩齊擊節俗眼誰能察識此我來北平

三月過關塞交游豈不多幾人風雅可共語懷抱鬱結
將如何今夜爲懽與衆異把酒休辭爛熳醉騎馬出門
鷄已鳴明朝更約東郊行

柳枝詞

友人有妾請去而不允者戲贈此作

白家柳枝遺不去韓家柳枝畱不住遣不去者情難忘
畱不住者有何趣可笑當年韓退之馬頭明月尚相思
昌黎此意旣癡絕君比昌黎應更癡

擊缶行畱別韓子任

韓生置酒城東園送我南歸去都門設坐正當兩芍藥
行觴復有三婢媛撥阮搗箏聲激楚齊唱南枝更凄苦
嶺南枝曲名中有小妓名翠兒歌罷又能擊缶舞擊缶古來
是秦聲雖非雅樂音韻清纖腰宛轉似無力狂態拖沓

疑有情主人勸客且進酒此舞江南所未有今宵把臂
不盡懽明日登車重回首聞說賢兄寓會稽秋風相訪
若耶溪子任之兄子有高士也避地浙東子任將往訪之是時我正客湖舫共
聽吳歛山月低

古藤歌爲兄子子詒比部作

四坐且勿喧聽我古藤歌古藤之壽如金石金石有時
而銷磨古藤之壽如松柏松柏有時而斧柯却訝此藤
本柔木結根永傍幽人屋紀年不識定金元生成擁腫
更拳曲密葉繁枝覆亭院藤花開日香如棟綠陰青靄
不受暑赤日黃塵從未見吾家郎官儼此居藤軒半間
長讀書客來便與飲藤下涼風習習吹人裾獨憐旅舍
難久住三年又欲遷官去京師都無一可戀所不能忘

贈馬行畱別王洵來秘書

我游樂亭買二馬一黑一白高麗種其形雖小性馴良
任渠馳驟可無恐北平刺史宋使君乍見此馬欲平分
古人讓國且不惜區區小駟何足云遂贈使君以白者
自騎黑者來都下偶訪故人王秘書秘書亦復愛此馬
我念京城難久居行將買棹歸淮徐龍媒正苦無寄托
得充君廐幸何如良由鄙性在山水竹杖芒鞋心所喜
卽使車前列五駒終不如欸乃一聲烟雨裏

炎風行畱別兄子子唯

炎風吹沙白日昏千騎萬騎如螳奔秋冬居此已不樂
况乃長夏氣如燔路傍倏與爾相見握手歛歛塵滿面

因訪天壇道院中短簷局促如旅店回憶鳳皇臺下居
質管數畝雜芙蓉年年三伏不知暑高枕北牕惟讀書
奈何舍此歸江北風景蕭條憂患逼一官鷄肋未能拋
五月驅車入京國屈指分携十四年衰顏短髮不如前
猶喜神明未凋落長句贈我情依然來朝我欲江淮去
他年聚首知何處青門折柳不勝愁買酒旗亭且猶豫

安陵行

安陵在景州西南十八里吾友張吏部環生景
州人前歲捐館舍今秋予自北歸過安陵欲往
弔之而舟人不聽且聞其墓在州之東村落中
無由訪問惆悵徘徊爰有斯作

往年張子令毗陵東吳四郡推廉能興利除害非一事
常州至今人猶稱是時我來自吳越寄居宇下羞干謁
邂逅蒙君國士知贈金十鎰情未竭明歲別君歸江南

雖有讒言不信讒逢人便問明農子招我重游我甚慚
旋聞考最人吏部山公藻鏡懸當路共道高名必揆輔
豈料盛年遂物故我過安陵懷舊恩東芻方欲慟君門
舟行那得隨人便竚立河干自愴魂

金龍四大王歌

有序

金龍四大王者宋處士謝緒也緒會稽人初爲
諸生隱錢塘之金龍山宋亡日夜痛哭陰結其
徒爲恢復計尋知勢去不可爲遂赴水死題詩
於石曰立志平口尚未酬莫言心事付東流淪
胥天下憑誰救一死千年恨不休湘水不流忠
義氣淮淝自愧破秦謀若溪北去通關塞留此
丹心滅口口其徒問曰先生之志決矣然他日
以何爲驗緒曰黃河水北流是吾報讐之日也
後太祖高皇帝與蠻子海牙戰于呂梁不利
忽見雲中有天將揮戈驅河逆流元兵大敗
帝夜默禱請其姓名夢儒生素服前謁曰臣謝
緒也憤宋祚移沉淵而死上帝憐我忠命爲河
伯今助真人破敵吾願畢矣次日卽封爲金龍
四大王蓋緒兄弟四人紀綱統緒緒最少又葬

于金龍山故名今清江浦廟中有記甚詳予讀之采以入詩

行人舟至黃河濱無不祭賽黃河神但知金龍四大王
不知大王何如人我來淮右天妃闡廟中歌舞尤雜還
巡觀壁間有石刻蔣生作傳董公跋上言金龍乃山名
處士謝緒懷忠貞心傷德祐移宋祚慷慨憤激遂捐生
身雖沈淵志不改石上題詩英爽在上帝命爲河濱神
西至崑崙東至海後逢真主起中原與敵大戰於彭門
鞭驅風雷暗相助河水逆流敵敗奔是夕見夢於帝所
自言姓名及肺腑因而勅封大王號沿河立廟爲河主
後人舟行大河邊生死仗神神赫然舟子往往見靈異
史不勝書民爭傳吁嗟草莽一逢掖精誠乃能貫金石
太平血食三百年忍見滄桑又如昔我亦嶽山老布衣

與君異代同所歸
瓣香勺酒拜祠下
預爲處士生光輝
露筋祠歌書梁公狄樞部詩後

甃社湖邊露筋祠
小艇來過必拜之
拜罷低徊不忍去
佇觀壁間無數詩
其詩雖多佳者少
獨愛梁生長句好
祇緣胸中有定識
以故下筆能了了
梁生道號曰鷓民
射陂菰蘆隱此身
老死南方不歸北
分明亦是露筋人

五言律體 五十五首

通州道中遇丘季貞文學

我自淮南至君從薊北歸揚鞭驚老眼下馬揖斜暉離
索情偏久倉皇語轉希僕夫催又別揮手各依依
初寓天壇作

匝地馬牛塵園丘憇此身尚餘松蓋古况復井泉新欲
雪風號夜無眠醒到晨擁衾猶覺冷愁殺早朝人

虎坊橋訪吳見末郎中

吾友本高士雖官仍素心驅車芳草遠閉戶白雲深
檢刑入妻子無餘祿生涯只苦吟天街塵漠漠半點不

聞方回
曾侵

故舊多零落憐予到朔方居停幸不遠晨夕得相望飯

客先儲酒論詩合對牀
閩游集在手猶帶荔枝香

報國寺訪曹淮湄大行

官閒樓古剝蕭寂似山村
托病且辭客讀書長閉門
每於霜月夜一到雪松根
此意真幽絕難爲動者言

星輅來下邑曾一訪
樵漁風雪淹旬日
郵亭肅起居

春淮湄奉使至桐
畱十日日與子飲
此方重握手相見卽烹蔬
京國人何

限沾沾獨愛子

王燕友銀臺招同兄子吉偶與三敦四夜集

淮南爲別日握手重沈吟
贈我高深句勞君山水心

見贈有桐山高我心勞
桐水深勞我心之句
兵戈長阻絕歲月忽侵尋
豈料

風塵裏良朋又盍簪

精廬藏僻巷特爲故人開
酒是梁谿載歌同易水哀孤

生無倚著羣從足追陪不厭吟聲苦霜天還復來

趙友沂中翰招飲感舊兼呈王涓來秘書

大雪蕪江夜輕舸擁妓行與君偕作達奇絕冠平生

冬友沂在蕪湖曾有此事彈指八年別停雲萬里情可憐燕市酒重

話到天明

三楚多時彥無如王趙賢書窮芸閣字筆裊御爐烟泛

愛容疎放高齋任醉眠定知歌舞者必不避彭宣

洞門先生

有女樂甚
秘情故云

從兄坦菴詹事有贈謝之

殘年頻送酒除欠又分金篤念羈孤者方知友愛深
人愁猛虎急難愧微禽此際誠何際區區尚在心

一身堆百福不省世間愁太滿能無槩將耆始有憂平

生元介立當寧豈苛求獻歲東風暖西山携我游

元日偕談長益處士宿吳岱觀孝廉寓中限春寒

二字

十四年前別三千里外人遇塗猶識面把臂各傷神相
訪期元日偕行有逸民盤中細生菜不異故園春
北地風沙苦兼之冰雪寒土牀先着火歲酒且爲懽被
少從鄰借燈孤與夜殘他時又離索方信此宵難

東吳錦雯孝廉

時寓天壇

七年不相見屈指聚燕山誰謂居停遠翻令會晤艱恐
人防靜業謝客掩玄關只有二王子朝昏數往還山長
苦吟三十卷君許爲吾刊以此望通籍勝於身得官白虹鴛
花春苑曉燈火夜廳寒好養追風力天街一日看

二月四日同談長益出都門

輦下三冬過愁中一事無欲尋邊塞去其奈客身孤老
友欣同往春風好並驅流觀山海勢絕勝在京都

通州

侵曉出重城潺潺聞水聲潞河水始泮遼海雪初晴利
涉無官渡凶人乃橫征更欺南客懦盡取意猶輕

永平

北平猶古郡風景未全消二水合灤漆一關分薊遼地
雖鄰絕塞人尚說先朝借問虎頭石城南七里遙

盧龍

盧龍原上路千古說田疇欲蹙烏桓勢聊借魏武游未
能舒國難且借報家讐自有傷心處辭金不拜侯

灤河

灤河通北海市日有鮮鯉旅食何須肉盤餐定作羨願
生一飽足撫事百憂并且勿傷流落殘春過此城

贈劉聲玉司理

郡齋何處是孤竹古城東未午吏皆散先秋獄盡空分
符聊下邑行野總春風勿謂催科苦文人自不同

是時聲玉

署樂亭縣事

漂泊江淮客驅車薊北過素書來楚畹芳訊及灤河

前

友沂皆
有書至

風雅聞聲久林泉引興多馬城滄海畔延賞意

如何

同李非文登孤竹山因悼其友徐大拙

客舍正愁寂君來破我顏貽詩涵岱色驅策自秦關此

嶺雙松樹當年孤竹山游人重懷古携手一躋攀

青州有徐叟風雅隱江淮百首君能記千秋名不埋獨
憐奄逆旅誰與殯枯骸今夜聞遺詠因之一愴懷

送嚴天行吳平露還都寄懷兄子蛟峯

塞上苦無友那堪君又還一尊臨漆水雙騎走盤山懷
古多新句千人每厚顏都門逢小阮爲道此游艱
吾友蔣民部君家住幾年本同薇蕨性頗耐雪霜天底
事來燕市相逢在朔邊唱酬懽正劇言別又凄然

憶江南

四首

江南春事蚤口腹最難忘白膩河魷乳澄鮮蛤蜊湯鱸
蓴初出水櫻筍正盈筐何必秋風起吳人始憶鄉

江南長夏日處處有鱒魚石首隨水至楊梅帶雨初菘

芹鮮比荔蓮藕賤如蔬香茗風前酌何愁暑不除
江南饒美饌收穫况逢秋出甌子驚熟堆盤母蠨稠橘
紅與菱白菱角復雞頭佐以黃花酒人間何所求
江南冬氣暖卒歲易優哉鮪自深泥出鳧從曠野來白
菘消酒渴青果點茶盃况有行根笋霜鋤掘卽開

遷安寓程生園有贈

朔方山氣冷三月尚無花立馬令支音連邑開樽公子

家櫻桃將破葢芍藥始抽芽便覺春風暖園林鳥雀譁
山城兵燹後下榻少僧廬只此餘高館欣然借我居近
邊多黍酒出水有灤魚日日憑斟酌何須更曳裾

談長益永平書來却寄

燕山冬復春無日不相親薊北同驅馬遼西獨問津古

人重高士今世賤遺民故舊且如此新知曷敢嗔
聞君寓已移旅食就僧炊怕熱應眠榻防偷更插籬既
爲修郡志且勿算歸期幸有韓公子時來一展眉

會試榜發久不得報有懷同社諸子

諸子皆耆舊亡何試禮闈便應驥首去未許卷懷歸輦
下新朝服山中老布衣高鵬與低鷄各自一行飛

宋玉叔憲使署中臺成招同長益雲雛諸子醮集

其上各賦二詩

宦游難免俗性不改林泉雖在邊城裏仍爲臺館偏栽
花循節序嗜古輯名賢退食來深坐休論晴雨天
勿謂使星遠客星相傍明戟門憑吏散畫壁見雲生愛
此臺上酌居然林下情那堪同調者旦夕又南征

飲張友鴻進士寓兼懷吳六益束鹿未回

京國推名飲冬春知不閒待君闡事畢予亦塞垣還水
浸盤中果雲生畫裏山遙憐彈鋏者驢背正閒關

飲程弢章進士寓因有三泐之約

嚴城多委巷良友惜離羣獨爾居相近與予情最殷書
憑污白練酒任瀆紅裙時有二妓在寓還訂初陽月雲間訪陸
雲

東章翌茲許天玉姚瞻子陸漢東四孝廉四子前此俱未

會試今始
至京調選

之子登科日 先皇全盛年姚癸酉科章丙子科許陸已卯科高文傳

海內晚節老江邊有逼重來此雖官亦可憐不如鷓鴣

鳥奮翅向南天

宋其武學士枉過爲竟日之談闕於展待答此

終日侍仙班曾無片刻間故人雖未見知爾甚相關何

一作

暇來荒寓聊淹看遠山僧厨乏杯酒惆悵又空還

龔孝升總憲以古色輕絳褥見惠謝之

客路虛休夏還山且過冬祗應擁敗絮曷敢藉輕絳佳

貺意何厚深辭懼不恭南屏霜雪裏披此看巖松

嚴子餐給諫以七言長歌送予歸率爾奉答

君是夔龍侶偏於巢許親燕山憐遠別越調送歸人對

此長疑面相思各損神爭如陳處士朝夕傍音一作塵

時陳亂情館于其家

兄子吉偶員外爲余題李伯時畫謝之

龍眠吾里人繪事妙如神塞上獲真蹟都中誇異珍雖

緣風格古亦賴品題新非汝擅三絕誰能信得真

王貽上進士携其全集見示荅此

王郎方弱冠山左擅詩名到處聞新作居然見老成知
予吟最苦相視眼偏明獨恨南歸促難爲縞紵情

胡東甌明府書至

上谷有知己相要出塞游思君當命駕倦客已歸舟芳
草江南暮黃雲漠北秋何時重會合書到轉添愁

荅程北海進士送別之作

前往北平道園丘爲舉杯今歸南國日麗藻又新裁愧
乏錦衾報爭推羽獵才孟冬還白下家醞許重開

留別丘曙戒秘書

昨夜才分俸今朝又贈詩還來馬首別忽動鴈行思家

室高堂戚心期老友知丁寧非一語到卽致君詞
秋水盈淮甸吾將此卜居良朋盡風雅生計在樵漁獨
爾畱中秘焉能返舊間薊門多驛使幸勿斷音書

滄州飲馬倩若叅軍

暮秋曾過此轉眼又新秋兩宿署齋冷三年官况愁酒
深雞易唱風急鴈難畱借問高常侍如今有後不唐高適滄

州人

七夕泊故城

殘暑不曾退新秋猶未交川原正浩淼風日又炎歊晚
見初弦月光生古樹梢微涼思一飲佳節莫輕拋

臨清道中立秋

老懷逢夏減詩思入秋多况是飄零者其如搖落何關

山增感慨風月助悲歌
向夕船頭立茫茫空逝波

分水廟

汶水同源出中流
兩道分天心成漕漕運神道勒奎文
廟中有永樂三年御製祭文
小艇北來客輕颿南去雲
榜人歌且舞從此息勞筋

魚臺道中

白晝雨冥冥舟師未肯停
斜風難掛席順水好揚舲
市小人烟冷魚多水氣腥
老夫唯熟睡竟日不曾醒

七言律體 五十六首

入都訪兄子子詒中翰

蹇驢破帽入京華，將到前門問爾家。
官舍蕭寒如野寺，古藤盤錯對秋花。
一肩行李聊棲托，八載鄉園總歎嗟。
欲解離憂唯雪酒，暫時忘却在天涯。

送李漑林憲使之任徐州

皖江分手悵如何，屈指都門共獻歌。
豈料冰霜之紫塞，又逢旌節去黃河。
彭城自古山川勝，郟伯從來雨露多。
明歲南歸淮泗路，雲龍放鶴許重過。

東兄子子建山人

我來京國寓天壇，泉石雖幽見客難。
稍喜中丞能假館，况鄰羣從且爲懽。
風沙又作彭城別，枕被那禁雪夜寒。

欲向青門餞遊子可無紅袖拂征鞍

贈丘曙戒秘書

去年風雪淮陰市吟榻長同令弟眠

令弟季貞也

今歲薄游

來朔漠乃兄高義復雲天過從百徧休辭客傾倒千鍾
不論錢况欲爲予覓人種風塵何處有嬋娟

贈王涓來秘書

王子前身是嶽僧偶然觀化下峻嶒

涓來自言前世爲廬山僧

總似春冰薄慧業還如秋水澄獨喜貧交來遠道每同
深話到殘燈更憐老冷尋燕玉此事今人能不能杜詩媛老

思燕玉是時涓來攝戒皆欲買妾送予予不受

嚴子餐給諫爲題西陵女子傳感而有作

我到燕山行李無所携只有抱鴛圖隨時展看千行淚

小傳裁成雙眼枯但遇詞人皆惋惜忽承佳句更悲吁
簾亭尚藉王忱力豈獨含情弔綠珠

陳階六給諫餉金謝之

眼底公卿多少年輕裘快馬朔風前掃門客尚艱杯酒
臥閣人誰損俸錢歸隱十霜微一出補官數月諫三篇
高情又似顏光祿所愧予非栗里賢

飲方干霄郎中邸

飯蘿山下昔爲鄰日日招携不厭頻服闋君應還輦轂
飢驅我亦向風塵潛郎館舍偏相近異地宗祊重與親
對酒何妨到深夜燈前俱是有鱖人

喜晤劉石帆太學

猶記秋霖宿爾家粉屏題句字欹斜草廳一別十年久

梅屋重開幾樹花正欲逢人詢楚澤豈知握手在京華
青氈去我無多地夜夜相尋酒可賒

與魏辨若涵一兩孝廉談易有合兼呈令兄石生

都憲

老生讀書鄙章句玩易直窺爻象先但與人言多不省
雖明聖道將誰傳知君家學本儒者聽我坐論殊豁然
閒時更就難兄問御史中丞今鄭玄

寄懷吳素夫處士

莫愁湖上送征人蒲葉榴花亦愴神自是友朋情眷戀
况兼兒女意酸辛孤惻忍使離吾膝慈愛應知似所親
雖不煩憂終不舍時將書札慰風塵

韓六一員外招同方干霄郎中小集

朔風吹雪滿燕山，旅舍重陰但閉關。忽有仙郎要我飲，也知朝士讓君閒。嚴寒不惜披裘往，深夜何辭着屐還。咫尺慈仁松樹古，天晴相約更追攀。

韓寓報國寺後

于慧男博士招同王山長孝廉小集

邀我偏於風雪日，不辭寒沍向東來。馬頭輕颺如飛絮，墻脚平舖似落梅。白酒正溫堪共醉，黃昏無路欲先迴。主人惆悵客留戀，臨別重斟八九杯。

歲暮宿王秘書邸，見其早朝甚苦戲爲此詩

鄰雞初唱勃然興，繡幙香衾戀不能。燈下重裘猶戰栗，風前瘦馬自凌兢。千官侍立足如鐵，九陌馳歸鬚有冰。始羨南牕方處士，蒙頭高臥日東升。

人日吳園次中秘招集興誠寺古槐下

同集者龔孝升都憲

石仲生學士吳岱觀

孝廉趙友沂中翰

蕭條旅况惜芳晨折柬欣逢吳舍人野寺雙槐龍爪舊
晴沙一簇馬蹄新坐依佛閣何妨久酒取鄰家不厭頻
借問長安冠蓋者春來幾個是閒身

元宵步月

朔方燈市從來盛南部烟花總不如老我正當三五夜
游人但說啟禎初歌樓舞榭惟聞鼓田婦村姑盡跨驢
間有碧紗籠可玩一枝動索萬錢餘

正月十九日龔孝升都憲社集觀燈

同集者趙洞門鴻臚嚴子

餐給諫吳岱觀孝廉談長益陳胤倩二處士吳

園次趙友沂二中秘吳蒼浮山人

京師勝日誇燕九遠近黃冠會白雲是日白雲觀何事
詩人偏聚此如今仙長合歸君酒斟玉笋葡萄色燭晃

銀屏翡翠文漫道馬牛塵壒裏尚容鸞鶴自爲羣

玉虛觀與李條侯夜話

昨歲淮南兩度游逢人便問李條侯參差蹤跡不相見
俯仰河山無限愁豈料高鴻罹網罟翻從逆旅結綢繆
匆匆杯酒那能盡爛醉彭城待早秋

正月晦日同談長益吳六益陳胤倩集報國寺松

下爲四布衣飲分得餘字

次日予將之北平

南歸未買尋源櫂北走仍馳出塞車只有高松情繾綣
况兼良友意縈紆金罍且憇重陰下鐵幹曾經百戰餘
回首蔣山多涕淚不知天壽近何如

霜根傳自金人種閱盡年華四百餘幾見疎狂如我輩
頻來觴咏屬春初風沙撲面休辭坐冰雪同心合與居

悔不從前長寓此朝昏相對一牀書

贈遷安劉明府含輝

有客騎驢東出關
令交南界見春山路
人爭說神明宰
膏雨長沾隴畝間
正擬歸時尋赤縣
那知郡邸識朱顏
景忠峯壑多奇勝
肯與提壺一往還

景忠山在遷安境內

韓子新兄弟招同長益夜集

雲樹蒼蒼古北平
君家兄弟最知名
花時正想班荆語
月夜先期折柬迎
吳越山川曾在目

韓多游江南

幽燕烽火

不勝情我思碣石觀滄海何日連鑣出塞行

趙獻清招飲聞邊曲有感

置酒高堂春夜深
忽聞絲竹動哀吟
當年祇是邊關調

一作

今日都爲吳越音
坐上有誰能顧曲
天涯無處不

傷心知君好客難辭酒一任胡姬取次斟

戲題北平寓壁

半生作客總南方不是僧房卽道房今出塞垣無可寓
暫棲民舍亦何妨雙雙健婦持門戶頓頓重魚佐酒漿
梁河出魚重鱗
土人謂之重魚
府夫婿從門來斜倚西北盼
語卿且勿盼水清石自見

隆教寺贈壽上人

上人歸棹自南都買得經文廿四櫺雖則中丞酬夙願
難於邊地起浮屠上人重修此寺蔡中丞施大藏經飯僧尚覺資糧少
款客偏多茶笋俱幾欲出城繙貝葉只愁無以助伊蒲
送笑上人出關兼懷祖心師

白岳雲峯好坐禪如何北走薊門烟祗疑古德山中少

不惜麻鞋雪裏穿，既以塵緣應解脫。翻於朋好故纏綿，
瀋陽今有高人在。更過遼西始息肩。

稊日飲田家

今年上巳客邊隅，風氣陰寒花柳無。暫出灤河觀逝水，
忽逢湯老薦新醑。重脣魚美鯽相似，雙尾蛭鮮蛤不殊。
醉眼矇矓是江左，勿因佳節憶粉榆。

宋憲使署中鸚鵡能言索贈二首

河隴驅車到朔方，携來鸚鵡掛雕梁。人雖側耳憐嬌語，
鳥自低頭憶故鄉。豈望誦經成舍利，漫勞作賦動詞塲。
酸辛最是關山路，繞樹聲聲問上皇。

勸君巧語莫多端，語巧人憐放蓋難。香稻滿瓶隨飲啄，
浮塵着羽易凋殘。方今爭尚惟鷹犬，惜此奇毛似鳳鸞。

若是漢禽秦吉了東飛定不過三韓

三月十九日

年年此日淚沾纓况是今年寓北平雙闕曉鐘還似舊
千官春仗不勝情緒淵王溥蒙恩澤袁粲韓通失姓名
猶有野夫肝膽在空山相對暗吞聲

荅徐玉海借書

久客邊城春事殘遐方無處借書觀勞君自送弁州集
開卷重生紫海瀾弁州自咏其詩云大海迴風生紫瀾七絕更如升岱攀
一甌何以報琅玕古語借書一甌牙籤錦標知盈室明日
還來次第看

偶過玉海小飲

雨牕終日對琅玕北地滄溟未足誇自覺鍾情向誰語

不妨索酒到君家
火燒玉露色香減
蜜浸人澆風味嘉
塞上春歸莫惆悵
杏花纔放又桃花

贈北平楊太守九章

邊塵漠漠塞雲黃
極目平原草樹荒
一自棠陰來召伯
頓教麥秀似漁陽
峴行野春風徧臥閣
彈碁夏日長
猿臂將軍猶有廟
歲時幸勿廢椒漿

送王西山明府之任閩中

君行萬里莫淒然
自古文人多左遷
官舍况當榕樹綠
王程正及荔枝鮮
從軍瘴海知無事
送客榆關悵各天
他日量移吳與越
相逢重在水雲邊

徐月鹿水部奉使杭州與予有同舟之約今羈北

平不得遊往遙寄此詩

君家兄弟本天人與我神交各有因京邸相逢如舊識
仙舟許附此閒身無端出塞淹山谷不及囊書候水濱
猶喜秋冬會稽去江關判醉玉壺春

登韓侍御釣臺

四首

鐵崖千仞俯青谿上有孤峯似卓圭因石爲臺供客釣
傍松結屋借僧棲牕中列岫芙蓉亂檻外羣漁舴艋齊
此景江南亦希有漫言薊北與遼西

聞說韓公仕聖朝黑頭蚤已慕松喬一竿烟水長爲主
七道徵書枉見招勝地生前管窺窅高風死後在嶠嶠
當年極盛猶甘隱未審如今肯折腰

東去遼陽海上山羣峯往往絕躋攀不如近郭林巒秀
自有親人魚鳥閒松栢千章圍墓道滄浪一派洗塵顏

傷心天壽諸陵樹葱鬱焉能似此間

豸繡文孫老布衣標持風節繼前徽三公不易青山樂
一艇長隨白鳥飛瀚海愁聞新戰伐灤河久別舊漁磯
故園丘壑今如此胡不携家自雒歸

侍御孫子新家于
驪陵

樂亭遇雨宿曹位之宅

倦游人自海城歸縱出闔關雨濕衣遙指前村有高士
不妨下馬款柴扉倉皇治具留予宿邊塞多聞似爾稀
今夜醉眠難再得他時回首思依依

留別宋大奎

王叔兄子也
讀書憲署中

日日思歸尚未歸故交情重莫能違囊空客與花爭笑
署冷君同鶴不飛幸有露臺長對酒怕言家難各霑衣
何時拔宅真江去也買漁舟傍釣磯

大奎欲卜居儀真

新茶坡入都寄張虞山范麋生闕百詩三書

濟水東來得鯉魚烹魚忽見故人書
上言薊北無知己相勸淮南且卜居
采藥尚須游茂苑結茅終欲傍精廬
何時轉棹天津去紅蓼花開七月初

西苑同茶坡閒步

十里芳湖抱一丘相傳遼后有粧樓
聖朝寬大何曾廢文士蕭閒並得游
今與胡僧營白塔爭容仙侶泛蘭舟
我來橋畔空延佇細柳新蒲無限愁

韓聖秋中秘招同許天玉白仲調諸子小集

我隨陽鳥到燕臺君去虔州尚未回
屢向城南僧舍問預知天上使星來
月如鳩浦深深夜酒似龍潭滿滿杯

聖秋舊寓龍潭蕪湖無數新知在京國
舊人相見眼偏開

送李岷瞻進士西歸并壽其尊公

李生挾策對春闈一日聲華滿帝畿自念高堂開壽域
還期采筆播芳徽重來定致千鍾養此去先裁五色衣
眼底新人非不衆各家才子似君稀

哭從子訥二首

翩翩書記客彭城賓主交懽甚有情分俸雖微聊佐讀
嘔心太苦遂捐生初聞浪說疑傳誤果見鄉書慟失聲

搢公子建
皆有書至

門祚衰殘天意酷年來奇禍莽縱橫

前年淮右同作客意氣飛揚篋尚空去歲黃河偶相遇
形容肥澤裝亦豐正喜歸家有菽水豈知客死如霜蓬
九原應見天冲子携手悲啼話阿翁

天冲子亡兒道號

六月望日陳階六黃門社集分韻

同集者闕中韓
聖秋闕中許天

玉粵東程周量湖南越友沂浙東倪玉純陳胤
倩雲間張友鴻吳六益朱韶九淮上蘄茶坡廣
陵吳園次劉玉少金陵
白仲調宛城徐次李

父老相傳隆萬時李王名著白雲司高吟自負千秋業
薄海人歸七子詩此日風流俱泯滅我曹出處又參差
何緣共對燕山月俯仰之間多所思

明農只合老蓬蒿旅食京華感二毛今夜就君非俗飲
主人與客並風騷月中槐影光偏亂露下芳尊興轉豪
侵曉獨憐予欲別三秋離思在江皋

七月一日出都門

山中猛虎嚙豪賢獨漉吟成北走燕交有良朋空歎息
手無利劔合憂愴因思枚里尋漁父又想皋橋買釣船
兩地未知何處好且歸南國看機緣

臨清追吳錦雯司理不及

都下相期一路回舟中每夜得銜杯我因病瘠行姑緩
君爲之官衆所催尚擬修途可追及其如輕舫只前開
計程應在張秋道也泊河干望客來

東昌贈劉太守定宇

劉曾守濠州

春風策衛古濠城父老猶稱舊守名今自北平還建業
又聞東郡有賢聲停舟欲識龔黃面好客偏多箕穎情
無奈歸心似流水揚帆恐不待雞鳴

濟寧贈王別駕石公

慈仁寺裏雙松下忽漫相逢悲喜俱秋浦論交成往代
長沙作令是危途量移山左宮雖小鄰接江南地頗腴
歸棹爲君停一日不知還有酒錢無

夏陽贈郭明府摩菴

屈指彭城訪故人，道經豐沛也相親。
豈知河上逢仙令，先枉舟中視逸民。
卓魯高風今尚在，蕭曹遺蹟未全湮。

蕭曹沛人郭今爲沛令

匆匆不得來游覽，黃菊開時一問津。

清江贈任計部崧翰

長淮風雪苦寒時，曾與羈棲困不支。
轉眼使星臨海嶠，笑看游子泊河湄。
春陰畫省長同醉，秋色江關自有期。
我欲卜居枚叔里，從容來乞草堂資。

贈胡水部階平

有客新從北道歸，停橈淮口立斜暉。
使君枉駕情何篤，舟子鳴榔興欲飛。
暫去劉伶臺下月，重來袁術浦邊磯。
頻頻索酒難辭醉，紫蟹紅鱗秋正肥。

題范麋生幽草軒

扁舟淮上往來頻，無數詩人與酒人。
獨爾高齋多暇日，留予堅臥動經旬。
布衣不作青雲夢，醉眼長看滄海塵。
莫向秋林悲落葉，年年芳草自逢春。

又題麋生樂志堂

堂名樂志義何如，良曰先人此敝廬。
世亂無心慕軒冕，才高得力在詩書。
田園尚欠仲長統，賓客偏多龔聖子。
聖子淮人也似爾承家真不忝，勿因風木重欷歔。

丘季貞西軒社集分韻

同集者劉阮仙學士姜真源御史姚山期魯仲展張

祖望何樊齊諸駿男宋份臣張伯玉胡天放張虞山閻再彭程維東婁東

卜居久已定長淮，此日機緣又不諧。
且繫孤舟尋舊侶，况逢羣彥聚高齋。
歌聲清脆悅人耳，詩句蒼涼感我懷。

三宿西軒莫輕別飛蓬明日又天涯

一蒲菴訪闍百詩夜話

殘荷細雨響秋池會宿茅菴序爾詩暫去燕山成隔歲
重來淮海又斯時月中鼓棹驚相訪燈下開樽喜共持
坐到天明方解纜只愁病體不能支

揚州飲王于一孫豹人齋頭偕宗兄聖羽學博

蕪城好友苦不多一二寓公藏烟蘿雄文麗句世莫敵
深巷短垣人少過見予拊掌忽大笑呼童貰酒且狂歌
廣文先生官雖冷也騎瘦馬來婆婆

邗關畱別諸駿男

我去蕪城秋水寒故人送我至河干解衣質酒高樓醉
冒雨尋花夾巷看隋苑久荒猶有恨雲英重見且爲懽

金山移身

用杜牧之事

佳期更指西陵路豐樂橋邊問考槃

龍江北岸阻雨

真州揚帆遇北風準擬今宵石城中秋江倏忽雷雨作
野航蕩漾蘆葦叢燕磯咫尺不得渡鳳臺消息焉能通
遙憐小女問阿姆連日燈花何太紅

五言絕句 十三首

故宮燕

昔日昭陽燕今日巢河濱豈不愛華屋傷哉舊主人

故宮鶯

上林雖百轉魂夢在江南一自蒼鷹貴黃鸝賤不堪

故宮鴉

城闕高千尺鴉羣依舊棲秋來何所恨夜夜似人啼

題酒家壁 四首

青帘隨處有我愛黃公家有錢自酣飲無錢亦肯賒
眼底人皆醉吾何能獨醒鋪糟餽醑者尚不至沈冥
問我來何數非關飲興豪風塵燕市裏或恐有荆高
飲罷登樓望春城烟樹重西山當落日萬朵青芙蓉

三月晦日

春歸人未去花下一沾衣也覺人歸好無家何所歸
人莫惜春殘春先笑人老有家自合歸無家歸亦好

五日

年年逢此日醜酒弔湘娥腸斷鴛湖水餘生恨轉多
蘭摧猶自激玉碎是人殘怕見葵榴色猶疑血未乾

七夕

天上佳期有人間好會無馬嵬何足道痛絕是鴛湖
不分雙星合空憐片月明舟中思往事獨坐對孤檠

七言絕句 五十四首

王燕友銀臺以四堯盃見惠云出自宮中者賦此

謝之

旅舍苦無盛酒物故人遺我四宮盃
盃文五采成龍鳳或恐先皇飲過來

窰非宣德卽嘉靖繪是丹砂與石青山澤遺民何忍用
藏於笥篋見儀型

天壇同劉杜三王山長吳岱觀嵇淑子吳錦雯王
白虹黃向先諸子飲屬余爲卜闢事皆不利戲
贈二絕

三十年間老孝廉也隨兒輩鬪毫尖看來俱是過時者
不待君平仔細占

無奈山中饑餒何便應謁選勿蹉跎殘年但得推知職
今世誰論甲乙科

喜談長益至

淮干折柳正新秋勸我京師勿浪游屈指別來纔五月
如何君亦到幽州
君到幽州有所爲盧龍曾與故人期故人亦我平生友
便與同車向海涯

王涓來席上贈歌者

塞北惟聞羯鼓聲那知南曲細如鶯不甘蔡琰終沙漠
且作何歌唱渭城

旗是廂紅復正紅贖身何日返吳中莫愁京國無知己
現有黃州太史公

除夕感懷 六首

去年除夕哭吾妾淮海愁雲慘不開今年除夕哭吾母
燕市悲風響更哀

南鳥無巢寄北枝中間木主供先慈一從家破蘋繁缺
敢學長江白祭詩

亂世元多失意人貧家婦子也相親那堪骨肉銷亡盡
四海茫茫剩一身

精衛英魂萬古傳抱鴛人豈瞑重泉憑教東海風濤惡
自有西山木石填

潤州談叟老詞場下第劉生亦楚狂憐我客中多涕淚
特來燈下共淒涼

是夕長蓋石帆皆在敝寓

北地士林寬且溫垂簾擁絮不開門今宵睡法同六字

三處家鄉一夢魂六音伊出內典王維詩三點爲伊猶有想

早春爲陳階六給諫初度四首

燕市栖栖冬復春，簪裾無數懶相親。今朝揚解爲君壽，

知是淮南舊酒人。階六自號楚州酒人

衣上黃塵鮮不緇，惟君素質似當時。都門何物堪持贈，

報國霜松一兩枝。

東山雖爲蒼生起，北闕其如補袞勞。回首劉伶臺下月，

漁舟臥穩不驚濤。

南方福地推淮甸，雞犬桑麻似武陵。他日卜居應在此，

看君白首杖青藤。

喜晤陳胤倩處士兼懷陸麗京梯霞

廬陵自古溪山好，尚有梅花冷暖殊。爭似錢塘陳與陸，

枝枝葉葉是林逋

豐潤阻雪

江南二月草萋萋
柳密花繁鶯亂啼
豐潤道中猶阻雪
春風未到北平西

馬蟻阪

齊侯經此伐山戎
日暮途窮水又窮
師蟻得泉馬得路
聰明幾與伏羲同

甲耳溪

田疇不賣盧龍塞
管仲曾臨甲耳溪
今日俞兒何處覓
烏桓牧馬過遼西

灤河

灤河春水雪消初
舉網雙雙得鯉魚
欲買魚歸是何意

腹中恐有故人書

書白學博夢母詩後

人皆有母母皆慈幾見人吟夢母詩白首尚懷孺子慕
青氈不愧秀民師
四十年來心力窮板輿長入夢魂中我今衣上線猶在
對爾如何淚不紅

清明

蘄北春深雪未消城南望遠思無聊忽聽人說清明字
一日何堪是兩朝

昌黎

絕代文章韓吏部中興事業李司徒兩賢俱是昌黎產
我欲從之今已無

遷安

莫言邊令好催科縣小民稀奈若何
一自投充與園占漢人田地剩無多

偏涼汀

灤河東去海天空白草黃沙一望同
惟有偏涼汀數里兩邊山色似吳中

玉河

海岱門前車碾塵玉河橋畔柳搖春
春來幾個閒行者千萬億人無一人

西苑

西華門裏御湖澄遼后粧樓昔可登
今日樓空惟白塔豐碑新賜喇嘛僧

金魚池納涼

池上茅庵松下身老僧相對話前因倦時坦腹南牕臥
不羨天街騎馬人

城南觀別者

離亭送客有雙娥遙指前山暮雨多也學蠻方鷓鴣語
低聲行不得哥哥

王涓來齋頭觀李峴瞻畫

長安六月苦炎蒸夢想江南歸未能今日對君揮翰墨
泠然濯我玉壺冰

題友人垂釣圖

江海橫流十五年蘆洲何處可停船算來淮甸粗安穩
且把漁竿釣晚烟

都下竹枝詞 二十首

金絲烟是草中妖，天下何人喙不焦。
聞說內廷新有禁，微醺不敢廁宮僚。

都門本是利名關，來去紛紛各不閒。
亦有京官十數載，從無偷眼看西山。

前朝勳戚盛如雲，後裔同歸廝養羣。
莫向灞陵嗔醉尉，何人猶識故將軍。

十謁朱門九不逢，所期杯酒話情悰。
無端醺會俱裁革，四字紅單密密封。
四字者來日候光也

投認師生法不輕，其初只爲杜逢迎。
因而場屋真知己，懷刺無他止姓名。

新法迷人律最嚴，如何逃者轉多添。
一家容隱九家坐

初次鞭笞二次點

本司三院舊鶯花此日飄零無一家惟有西河沿上柳
年年春色解藏鴉

侵晨旅舍降嬋娟便脫紅裙上炕眠傍晚起身纔勸酒
一回小曲一筒煙

牛車無數塞天街俱是兵兒運草柴科道相逢誰敢喝
欠身立馬任擠排

詞林相見首言貧欲結穹廬未有因借債先尋保債者
無如戶部點差人

自昔旃裘與酪漿而今啜茗又焚香雄心盡向蛾眉老
爭肯捐軀入戰場

東成榆關西渡河今人不及古人多風吹草底牛羊見

更有誰能勅勒歌

滿粧羣婢槩無夫
鍼線傭工立路隅
每日百錢持送主
無錢罰餓使樵蘇

老婦樵蘇力已衰
日尋牛馬糞盈箕
晚來頭戴箕歸舍
小雨濛濛萬淚垂

南海降王款北庭
路人爭擁看其形
紫貂白馬蒼顏者
曾攪中原是殺星

青袍下第各沾巾
謁選遲遲十五年
少兒郎猶可待
壯夫惟有鬢如銀

故老田居好是閒
無端薦起列鴛班
一朝謫去上陽堡
始悔從前躁出山

自古長安似弈棋
一番客到一番悲
許多大老休官去

幾個名媽又嫁誰

蘆中貧士亦何愚
燕市來尋舊酒徒
漫說荆高零落盡
卽令相見酒錢無

有客慈仁古寺中
蒼龍鱗畔泣春風
布衣自有布衣語
不與簪紳朝士同